

Date – 21/09/2025

Time - 07:30 -07:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Sorkar laipuiin Good & Services Tax (GST) lak dan thar a hman tur chuan nghawng a nei nasa.
2. Transport Minister Pu Vanlalhlana chuan zirlaite chu zirlaibu chauh ni loin, thiam thil dang neia tura inzir turin a chah.
3. Prime Minister Narendra Modi chuan India ram chu tuipui lama hmasawwna nei tura sorkar hmathlir pholangin kum 2047-ah tuipui lama sumdawwna lama a chanvo chu a let thum-a tihpun a tum thu a sawi.
4. Commerce and Industry Union Minister, Piyush Goyal chuan Thawhtanni September ni 22 hian palaite nen United States an tlawh dawn.

<><><>

GST – MOTOR

Sorkar laipuiin Good & Services Tax (GST) lak dan thar a hman tur chuan nghawng a nei nasa hle a, Mizorama lirthei zuartu te pawhin tun hma aia nasa zawkin an lirthei zawth te an hralh chhuak ngei dawn tih a hriat tawh a ni.

G.I.G Motors thuneitute hnen atanga Akashvani thudawn danin, nimin September ni 20 kha GIG Motors chuan ni khata lirthei lei tura inziak lut tam ber an tawn tum a ni hial a. Kum 2017 khan ni khata lirthei lei tum inziak lut an tam ber tum record an lo siam tawh a, an record hmasa hi tunah an khum a, nimin khan lirthei lak tum mi 58 lai an inziaklut a ni.

Akashvani thu dawn danin, GST 2.0 hman tur hi Mizo mipui te tan pawh a tha dawn hle a, hemi avanga motor man offer san laia lak hman ngei tumin G.I.G Motors hnuaia ARENA leh NEXA Showroom kaltlangin lirthei hi a hralh hnem dawn a, inziak lut te hi naktuk Septeber ni 22 atanga pek chhuah runpui neih a ni ang.

G.I.G Motors chuan an hnuaia Showroom - ARENA Edentharr, NEXA Thuampui, Commercial Chaltlang leh Lunglei Outlet atangin September thla chung hian Motor 250 chuang pek chhuah theih an inbeisei thu an sawi a ni.

(GST thar tur chungchang hi Akashvani chuan a lo zirchiang fo tawh a, a lan dan chuan lirthei man hi nasa takin a tlahniam dawn, hei vang hian lirthei lei thar an pung viau tura nghaih a ni. GST tharah chuan, tun hma lara chhiah 28% vel an lak thin kha 18% bawrah a tlahniam dawn a, hei hian nghawng lian tak a nei dawn a ni.)

<><><>

SENIOR MEET

Mizoram Synod hnuaia Pastor bial hrang hrang te chuan vawiin hian Senior Department inkhawmpui an hmang dawn a, bial thenkhat chuan Senior Meet tiin a hming an phuah bawk.

Pastor bial thenkhat chuan thu leh hla hmanga intihsiak nan hun an hmang thin a, bial thenkhat erawh chuan intihsiak loin chanvo hrang hrang inruat chhuakin inkhawmpui an hmang thin thung a kuminah pawh hman dan chi hnih a awm leh a rinawm.

Mizoram Synod hnuaia Sunday School te hian kar hmasa khan naupang lam, intermediate leh a hnuai lam chin inkhawmpui an lo hmang tawh bawk a, kum tin September thla hian naupang inkhawmpui hi hman thin a ni a, Pastor bial thenkhatah chuan inkalpawhna kawng tha tawh lo avangin ruah sur loh laia hmang pawh an awm thin.

Mizoram Synod Website tarla dan chuan, Mizoram Synod hnuaiah hian pastor bial 298 an awm a, kohhran 1,139 awmin Sunday Schol zirtu 4,44,059 awmin zirtirtu 56,815 an awm mek a ni.

<><><>

MSA BENGALORE

Transport Minister Pu Vanlalhlana chuan zirlaite chu zirlaibu chauh ni loin, thiam thil dang neia tura inzir turin a chah.

Nimin khan Mizo Students’ Association (MSA) Bangalore-ten kumtina an buatsaih ‘Zirna Kutpui’ chu United Theological College, Bengaluru-ah hman a ni a, Minister chuan zirlaite chu Mizoram pawna an awm chhan hre reng turin a chah a. Nakin lawka ram leh khawtlang hruaitu turte in ni tiin, tun atanga kum engemawzat an hman dan chuan an hmalam hun thui tak a hril dawn a ni, a ti a. Zirlaibu atanga thiamna chu a tawh tawh lo tiin thiam thil dang nei tura inzir chhunzawm zel tur leh khawvel inher danglam mila insiamrem thiam turin a chah a ni.

Pu Vanlalhlana chuan zirlaite chu harsatna hrang hrang an la tawh chho dawn a ti a. Beidawng mai lo tur leh, chung harsatnate chu chhelna leh tumruhna nena hmachhawn zel turin a duh thu a sawi a ni. Mizoram pawnah eizawna tam tak a awm nia a ngaih thu sawiin, hnam dang zinga mi competitive tak ni turin, discipline neih a pawimawh a ti a. Sawrkar hna bakah private sector-ah ngei pawn thiamna nei, a ngaihna hre tan chuan dinchhuahna tur a awm a ni, a ti bawh.

Zirna Kutpui hi MSA Vice President Tv. Benjamin Zorinsanga’n a kaihrui a. MSA Secretary Nl. Lalhminghlui atang report nghaihthlak a ni. He hunah hian zirlai ti thate chawimawina hun hman niin, inelna hrang hranga lawmman sem a ni bawh.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

GST REFORMS

Pachhunga University College Asst Professor Dr Daniel Lalawmpuia’n Sorkar laipuiin GST chhiah thar hman hunah tharchhuah leh siamchhuah a pun bakah mipui sum hman a tam phah rin a ni a ti a, hei hian sum dinhmun a tih ziaawm phah beisei ani tih a sawi.

Akashvani Aizawl Regional News Unit New India Samachar Programme ah he thu hi sawiin Dr Daniel Lalawmpuia chuan GST Reform 2.0 hman a nih hunah thil man tlawm tur chu chhungkaw tam tak tan thil hlu tak tur ani dawn ati a, thil man a tlawm chuan sum hmanchhuah a tam rin ani tih sawiin tharchhuah leh siamchhuah ti pungin ei leh bar zawna kawngah hmasawna a thlen phah zawk dawn a, nasa takin ram a thang thei tura beisei ani tih a sawi.

Dr Daniel Lalawmpuia chuan GST tharah chuan ngaih pawimawh tak tak lungphum 7 an rawn dah a ti a, hetah hian GST alo hlawhtlin zel theih nan ram pakhat chhiah pakhat tih angin chhiah mumal zawk leh awlsam zawk an ruahman tih sawiin chhiah lak dan phungah dik leh langtlang zawk kalpui a ni a, GST pe tu tur sumdawngte tana awlsam taka chhiah an pek theih nana tunlai thiamna hman tangkai ani dawn a ti a, state hrang hranga chhiah chu GST hnuaiah an khung tih sawiin One Nation One Tax kalpui tura ruahman ani tih a sawi bawk.

<><><>

MINISTER SAWIVUNGA

Pang Zirlai Pawl, Joint Headquarters, Aizawl buatsaih, zirlai tharte lawm luhna leh zirlai tithate lawmpuina hun, nimina hmanah District Council & Minority Affairs (DC & MA) Minister Pu C. Lalsawivunga leh Mizoram Youth Comission MYC Chairman Pu Malsawmzuala ten an hman pui.

I&PR Auditorium, Treasury Square, Aizawl-a hun hmanah, Khuallian DC & MA Minister Pu C. Lalsawivunga chuan Mizorama chi bil leh hnam pêng hrang hrang awmte chu Mizo an nihnain phuar khâwm zêl se a duh thu sawiin, “In la hrang tham leh inen hrang tham an awm lo va, inpumkhat leh lungrual taka an chenho hian hnam a chhiar tham leh hnam zahawm an nih phah a ni,” a ti a. Hnam anga din chhuah theih nan inunauna leh inpumkhatna dah pawimawh a tûl thu sawiin, mahni awmna hmun theuhah ram leh hnam chhan nâna theihtawp chhuaha rinawm leh huaisen taka hmalak a tûl thu a sawi a. Kal khâwmte chu ram leh hnam intodelh ni tûra tan lakpuiah sâwmin, zirlaite chu ram leh hnam tân eng nge ka tih ve theih tih ngaihtuah rân chungah lehkhâ taima taka zir tûrin a fuih a ni.

<><><>

PM

Prime Minister Narendra Modi chuan nimin khan Bhavnagar-ah ‘Samudra Se Samriddhi’ programme-ah thu a sawi a. India ram chu tuipui lama hmasawnna nei tura sorkar hmathlir pholangin kum 2047-ah tuipui lama sumdawnna lama a chanvo chu a let thum-a tihpun a tum thu a sawi a, khawvel remna, muanna leh hausakna a awm theih nan khawvela mihring tamna ber ram chu mahni inrintawkna nei a nih a ngai a ni, a ti.

Midang rinchhanna hian hnam zahawmna a tichhe thin tih a sawi bawk a. India mi nuai 140 hmalam leh an hma sawnna tur chu ram dang kutah dah theih a ni lo tih a sawi a. Harsatna tam chinfelna chu Atmanirbhar Bharat (Self Reliant India) siam a nih thu a puang. Chumi tihlawhtling tur chuan India chuan harsatna a hmachhawn a ngai a, pawn lam atanga innghahna a tihtlem a ngai a, mahni inrintawkna dik tak a lantir a ngai bawk a ti a ni.

News On Air

